

## Lettre Jèrriaise – Les Pronm'nades

Bouônjour. Ch'est Michael Halliwell tchi vouos présente La Lettre Jèrriaise aniet lé 27 dé Novembre 2021.

Quand j'têmes mousses, j'habitions dans la rue Saint Sauveur et pour man fréthe et mé y'avait deux principales activités. J'pouvions nouos otchuper avec nos jouettes, ou j'étions oblyigis dé faithe des pronm'nades. S'i' tchiyait d'la plyie, j'pouvions jouer et j' étions au ciel. S'i né tchiyait pon d'plyie, j'étions oblyigis dé faithe des pronm'nades.

Mais i'y' avait deux sortes dé pronm'nade. L'une ménéée par not'mémée, fut eune pronm'nade séthieuse et longue. L'aut, ménéée par not' nosse, fut une pronm'nade ordinaire et courte. Chutte pronm'nade ordinaire nouos ménéait tout douoquement dans l's alentours du Collège Victoria. Là, j'pouvions cèrtainement rencontrer par hasard des nosses d'aut's fanmil'yes. Quand i' caqu'taient, j'pouvais m'èrposer des fatigues dé la marche. Et les nosses pouvaient s'entret'nîn. Un jour, quand deux des nosses bavardaient, j'èrtithis dédans l'aut' vaituthe d'êfant, un p'tit moto tchi m' pathaïssait hardi désirabl'ye. Jé chouaïsis un moment favorabl'ye, lé prîns et lé muchis dans la vaituthe dé man fréthe. À not' èrtou, j'avais du ma à explyitchi pouortchi qué j'avions eune jouette dé trop. J'ai dû avouer la raïson et confesser man crînme.

Les pronm'nades séthieuses 'taient ménéées par not' mémée. En Été, j'allions au Havre des Pas nouos pronm'ner dans les gardîns. Un biau jour, i' s'adonnit que j'allînmes au Havre des Pas et, dans les gardîns, j'apèrchus une danme assise souos un parasol. Né sachant tché qué ch'tait, j'criyais à ma mémée à haute vouaix : « Mémée, pouortchi qué chutte danme-là a son paraplyie dans lé solé » ? « Tchil êfant impèrtinent ! » èrplyitchit la bouonnefemme, mé réduit au silence. J' m'èrtouônnis siez mé tout honteux.

J'aimais mus l's extchursions dans la Vallée des Vaux, ou « Ducks Valley » comme j'disions. La marche 'tait pus întéressante, sustout i' y avait des basses muthâles sus lestchelles j'pouvais grînmper et

marchi déssus. Et pis, j'arrivêmes dans un gardîn auve des p'tits ponts sus les ruisselets, et parfois, i' y' avait vraiment des cannards. Par dessus chute rencontre, i' y' avait p'têt un grand monsieur. I' 'tait si grand qué jé n'viyêmes qué jusqu'à ses g'nouors. J'avais 'té apprîns à li dithe « Bouônjour Mr Horn » s'i' nous pâlait. Mais j' crais qu'i' 'tait si haut qu'i' n' viyait pon ches p'tits mousses-là à ses pids.

Parfois, j'allions en Ville où'est qu' ma méthe faithait l's acats pour la s'maine. Not' maîson favothabl'ye ch'tait siez Orviss où'est qu' Mess Le Quesne nous sèrvait, en pus, i' y' avait eune tchaîse où'est qué j'pouvais m'èrposer. Ma mémée avait sa liste qu'ou liêsait, et Mess Le Quesne notait les nécessaithes. I' y' avait deux specialités siez Mess Le Quesne qué j'aimais hardi bein; d'abord i' y' avait des biscuits où'est qué j' pouvais faithe mon chouaix, et pis, i' y' avait les bouaissions qué nous n'avions qué rarement, tant qu'i' 'taient chiéthes. Mais man plus grand întéthêt 'tait lé système dé transport aérien où'est qu' les sous volaient à toute vitesse sus des ouaieurs. Malheutheusement, ma mémée appartenait ès privilégiés tchi né payaient qué mensuellement, ch'est pouortchi qué chu système nous dépassait totalement. Chennechîn mé rendait hardi triste.

À la fin dé not' pronm'nade, j'pouvions èrtrouver nos jouettes et i' y' avait parfois une bouonne récompense, du pain rôti avec du beurre au pid du feu.

Merci pour m'aver êcouté. Ch'est Michael Halliwell tchi vos souhaite eune bouonne s'maine, restez sain et sauf et à bi pour achteu.